



Saintis NTU temui cara bakar lemak dengan hanya gunakan pelekak

28/12/2017 20:26 Update: 28/12/2017 23:30

SINGAPURA: Tidak lama lagi mungkin ada cara yang lebih mudah untuk membakar lemak degil di bahagian perut anda, tanpa berdiet ataupun bersenam.

Para saintis di Universiti Teknologi Nanyang (NTU) sedang mengusahakan sebuah pelekak yang bertujuan membakar lemak di bahagian-bahagian tertentu.

Ujian makmal sejauh ini ke atas tikus terbukti berkesan.

Berat badan dan jisim lemak tikus berkurangan lebih 30 peratus dalam masa empat minggu.

Tikus-tikus itu juga mempunyai kolesterol darah dan paras asid lemak lebih rendah.

Pelekak baru itu mengandungi ratusan jarum halus yang diisi dengan ubat-ubatan menguruskan badan.

Ubat-ubat itu kemudian akan menukar lemak yang tidak berguna kepada lemak yang baik untuk tubuh.

Menurut para saintis, jumlah ubat-ubatan dalam pelekak ini lebih rendah daripada ubat-ubatan yang dimakan.

Pasukan pengkaji itu kini sedang mencari dana bagi memastikan pelekak ini selamat untuk digunakan manusia.

- CNA/FA/fa